

Savaateqarfinnut inoqarfinnullu allanut nannut tikiuttut qimaatinniarsareqqaarnagit takunneqqaartumit pisarineqarsinnaalersillugit Namminersorlutik Oqartussat nalunaarutaanni nr. 5-imi, 6. marts 2023-meersumi aalajangersakkat allanngortinneqarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut. Nannup pisarineqartup neqaa najukkami agguaanneqassaaq sinneralu pisaqartumut tunniunneqarsinnaassalluni.

(Inatsisartunut ilaasortaq Mariane Paviasen, Inuit Ataqatigiit)

Aamma

Nunatta kujataani nannuttassiissutigineqartartut ukiumut sisamaasut 2025-imiit ikinnerpaamik ataavartumillu qulinngortinneqarnissaat qulakkeeqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Anders Olsen, Siumut)

Akissuteqaat

(Aalisarnermut Piniarnermullu Naalakkersuisoq)

Aappassaaneerinnineq

Aalisarnermut, Piniarnermut Nunalerinermullu Ataatsimiititaliap imm. 59-ip aamma imm. 87-ip aappassaaneerineqarnissaanut isumaliutissiissutaanut Naalakkersuisut qujapput.

Imm. UKA2024/59 aallarniutigissavara.

Isumaliutissiissummi Ataatsimiititaliap isumaqatigiittup allannguutissatut siunnersuut imaattoq saqqummiussani akuerineqassasoq:

"Najugaqarfinni sumiiffinnilu inuit katersuuffigisaartagaanni nannut inunnut akornusersuisut ulorianartorsiortitsisulluunniit akuersissummik pissarsiniaqqaarnani aammalu qimaatinniarsareqqaarnagit toqunneqarsinnaalersillugit malittarisassanik aalajangersaanissamut suliniuteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Nannup pisarineqartup neqaa najukkami agguaanneqassaaq sinneralu pisaqartumut tunniunneqarsinnaassalluni."

Siullermik Naalakkersuisut sinnerlugit erseqqissaassutigeqqissavara kinaluunniit sumiikkaluaruniluunniit nannumit ulorianartorsiortinneqaruni imminent illersorniarluni nannumik toqutsisinnaatitaavoq, taannalu pinerluttulerinermut inatsimmik tunngaveqarpoq. Taamatullu pisoqarsimatillugu politiit naliliisussaapput ilumut ulorianartorsiortoqarsimanersoq.

Allannguutissatut siunnersuut piviusunnugussappat Nannut illersorneqarnissaat piniarneqarnissaallu pillugit nalunaarut nr. 5, 6. marsi 2023-meersoq allanngortinneqartariaqarpoq. Aalajangersakkat pineqartut allanngortinneqarnissaannut Naalakkersuisut suliaqarnissamut piareersimapput, oqaatigissallugulu sulinissaq piffissamik atuiffiujumaartoq.

Maanna imm. UKA2024/87-imut.

Ataatsimiititaliap isumaliutissiisummini nuna tamakkerlugu nannuttassiisutit amerlineqarnissaannik suliniuteqaqqullugit Naalakkersuisut ataatsimiititaliamit isumaqatigiittumit kaammattorneqarput.

Pisassiissutiniq qaffaasoqassagaluarpas nungukkiartuutaanngitsumik atuinissamik periuseq aammalu mianersortumik periuseqarnissaq malinneqartussaapput. Aamma pingaaruteqarpoq maluginiassallugu ataatsimiititaliap eqqumaffigimmagu nunanut allanut isumaqatigiisutit aamma tungitsinniit isiginiarneqartussaammata.

Uumasorsiuut inassuteqaataat Kitaanut tunngasoq 2028 ilanngullugu atuuppoq. Naalakkersuisut Tunu pillugu nalunaarusiat utaqqivai. Piniartut ilisimasaat pillugit nalunaarusiat Avangersuarmit 2006-ernissaavoq Tunumiit 2011-rnisaalluni. Kujataa pillugu, piniartunik savaatilinnillu 2023-2024-mi apersuilluni suliaqareernerup kingorna nalunaarusiaq 2025-mi saqqummersinneqassaaq. Pisassiissutissat qaffanneqarnissaannut Naalakkersuisut pitsaaneruseq tunngavissaqartariaqarput, neriutiginerporlu paasissutissat pisariaqartinneqartut ukiuni tulliuttuni pissarsiarineqarumaartut.

Ataatsimiititaliap isumaliutissiisummini naatsumik inuusaaseq tunngavigalugu pisassiissuteqartarneq (kulturkvoter) taavaa. Tassunga tunngatillugu Naalakkersuisut sinnerlugit erseqqissaatigissavara inuusaaseq tunngavigalugu pisassiisarneq pisassiissutaareersut iluanniit ilaatinneqartarmat, kommuninut pisassiissutini, taamalu namminneq aalajangersinnaallugu inuusaaseq aallaavigalugu pisassiissutit iluanniit immikkoortitsisoqassanersoq.

Naalakkersuisut Inatsisartut aalajangererat tusaatissatut tigussavaat, malitsigisaanillu nalunaarutip atuuttup nutarterneqarnissaa suliarilersaarlugu.